

आकाशवाणी जयपुर-अजमेर
प्रादेशिक समाचार

- केंद्रीय वित्त मंत्री निर्मला सीतारामन सार्वजनिक हलकां रा बैंकां रा कामां री समीक्षा करी ।
- रक्षा बंधन माथे बहनां भाईयां री कलाई माथे बांधी राखी-लिया हिफाजत रो वचन ।
- सावण रा आखिरी सोमवार माथे आज शिवालयां मांय भक्तां रो उमाव चरम माथे-शिव मिन्दरां मांय खास अनुष्ठान ।

अर

- राज्य मांय बिरखा रो दौर चाले- राजसमंद, भीलवाड़ा, धौलपुर समेत केई ठौड़ां हळका ऊं मझला दर्जा री बिरखा ।

000

केंद्रीय वित्त मंत्री निर्मला सीतारामन आज नुवी दिल्ली मांय सार्वजनिक हलका रा बैंका रा प्रदर्शन री समीक्षा करी । ई मीटिंग मांय रोकड सेवा मेहकमां रा सचिव डॉ. विवेक जोशी सार्वजनिक हलका रा बैंकां रा प्रबंध निदेशक अर मुख्य कार्यकारी अहलकार अर दूजा ठावा अहलकार भेळा व्ह्या । बैठक रे दौरान, वित्त मंत्री जमा बढवार, करज ऊं जमा अनुपात अर परिसंपत्ति गुणवत्ता री समीक्षा करी । वणा प्रधानमंत्री आवास योजना, प्रधानमंत्री सूर्य घर अर प्रधानमंत्री विश्वकर्मा योजना जस्सी सरकारी पहलां रे तैत सार्वजनिक हलकां रा बैंकां रा काम री ई समीक्षा करी । वित्त मंत्री क्षेत्रीय ग्रामीण बैंकां रा कामां री ई समीक्षा करेला ।

000

पंद्रह वैश्विक दक्षिण देशां रा तीस स्वास्थ्य नीति निर्माता अर विशेषज्ञ आज ऊं चार दिन री जात्रा माथे भारत आया है । आ जात्रा विदेश मंत्रालय, स्वास्थ्य मंत्रालय अर भारतीय फार्माकोपियां आयोग री मदद ऊं व्हे री है । स्वास्थ्य मंत्री जगत प्रकाश नड्डा आज नुवी दिल्ली मांय ई कार्यक्रम रो उद्घाटन कर्यो । ई जात्रा रे दौरान, नीति निर्माता अर विशेषज्ञ आप रा भारत रा बरोवर वाळां रे साथै बतळ करेला । आ विशेषज्ञ सदस्य जनऔषधि

केन्द्रां, दवायां अर टीका निर्माण इकाइयां अर अनुसंधान प्रयोगशालावां ने देखण सारू आगरा अर हैदराबाद ई जायेला ।

000

भाई—बहन रा हेत रो प्रतीक रक्षा बंधन आज रीत मुजब उमाव रे साथै मनायो जावे । ई मौके बहनां आप रा भाईयां री कलाई माथे रक्षा सूत्र बाध ने वां रा स्वास्थ्य अर समृद्धि री कामना कर री है । भाईयां कानी ऊं बहनां ने हिफाजत रा वचन रे साथै निजराना अर सगुन दे र रीत निभा रिया है ।

राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेंद्र मोदी, राज्यपाल हरिभाऊ किसनराव बागड़े अर मुख्यमंत्री भजनलाल शर्मा राखी रा तिवार रे मौके शुभकामनावां दी है । प्रधानमंत्री सोशल मीडिया संदेश मांय कामना करी के ओ पवित्र तिवार रिश्तां मांय मिठास अर लोगां रा जीवन मांय सुख, समृद्धि अर सौभाग्य लावे । प्रदेशभर मांय रक्षा बंधन ने ले र लोगां मांय घणो उमाव देखीजे । बाजारां मांय राखी अर मिठाई मेवे खरीदण ने ले र तड़के ऊं ई चहल—पहल बण्योड़ी है । रक्षा बंधन माथे सरहद माथे तैनात जवानां री कलाईयां माथे राखी बांधण ने ले र केई संस्थावां अर संगठनां कानी ऊं कार्यक्रम राखी ज्या । लोकसभा अध्यक्ष ओम बिरला आज कोटा मांय कोरोना पीडित पिरवारां रे साथै रक्षा बंधन रो तिवार मनायो । श्री बिरला बहनां ने रक्षा बंधन री शुभकामनावां दी । जयपुर रा मोती डूंगरी गणेश मंदिर मांय भगवान रे चांदी री राखी बांधी ज्यी । बीकानेर मांय महिलावां अर स्कूली छात्रावां बी.एस.एफ. जवानां रे राखी बांध ने वां री लाम्बी उम्र री कामना करी । बाड़मेर मांय रक्षा बंधन माथे न्यारा—न्यारा संस्थावा कानी ऊं देश री हिफाजत मांय तैनात जवानां ने राखी बांधी ज्यी अर देश री हिफाजत सारू वां रो आभार जतायो ।

श्रीगंगानगर मांय हिन्दुमल कोट अर मदन लाल चौकी माथे महिलावां अर बालिकावां सैनिका रे राखी बांधी ई दौरान पौधा रोपण कार्यक्रम ही व्ह्यो । डीग रा प्रिय सखी संस्था कानी ऊं फिरोजपुर कैन्ट रा हुसैनीवाला बॉर्डर माथे जवानां सारू एक हजार एक राखियां भेजी ज्यी । चूरू मांय देश री हिफाजत सारू शहीद व्ह्या जवानां री बहनां वां री मूरत रे राखी बांधी । प्रदेश री न्यारी—न्यारी जेळां मांय बंद कैदियां रे ई रक्षा सूत्र बांधण सारू घणी तादाद मांय बहणा पूगी । पाली अर झुन्झुनू मांय जेळ मांय बंद कैदी भाईयां सारू बहनां कानी ऊं राखी बांधण सारू जेळ प्रशासन कानी ऊं खास बन्दोवस्त करी ज्या । जैसलमेर मांय आज रक्षा बंधन रे मौके जिला अस्पताल

मांय भर्ती महिला रोगियां ने बिना रिप्लेसमेन्ट रे रक्त मुहैया करायी ज्यो। जिला ऊं लगाती सरहद माथे देश री हिफाजत मांय लाग्या जवानां री कलाई माथे रक्षा सूत्र बांध र बहनां देश री हिफाजत रो वचन लियो। सवाईमाधोपुर, दौसा, सीकर अर भरतपुर मांय ई रक्षा बंधन हरक उमाव रे साथै मनाया जावण रा समचार है। करौली मांय रक्षा बंधन रे मौके लोगां पतंगबाजी रो आनन्द लियो। राजस्थान रोड़वेज कानी ऊं रक्षा बंधन रे मौके आज महिलावां ने मुफ्त जात्रा री सौगात दीरीजी है।

आज रात 12 :00 बज्यां ताई वॉल्वो अर एसी बसां ने छोड र प्रदेश री सीमा मांय चालण वाळी सगळी रोड़वेज बसां मांय आ खास सुबिधा रहवेला मुफ्त सफर रो लाभ उठावण सारू बेगा संवारां ऊं ई बस ठेसणां माथे महिलावां री भीड़ दिखण लागी। जयपुर रां सिंधी कैम्प बस ठेसण माथे रोड़वेज प्रशासन कानी ऊं महिलावां सारू खास इन्तजाम करी ज्या है।

महिला सुरक्षा ने ले र पुलिस प्रशासन सावचेती बणाया है। रक्षा बंधन माथे केई ठौड़ां नवाचार अर रीत निभाई जाय री है। पाली मांय सरोवर घाट माथे तरपण करी ज्यो अर शहीद स्मारक रो पूजन कर ने श्रिद्धांजलि दीरीजी। पुष्कर सरोवर मांय रक्षा बंधन माथे रीत मुजब हिमाद्री स्नान कर ने जनेऊं धारण करी ज्यी।

000

सावण मीना रा आखिरी सोमवार माथे आज शिवालयां मांय भक्तां रो उमाव चरम माथे रह्यो। प्रदेशभर मांय शिव मिन्दरां मांय सिरधालू जलाभिषेक रे साथै भगवान शिव री आराधना करी। रक्षा बंधन अर सावण सोमवार एक ही दिन होवण ऊं शिवालयां मांय खास उमाव निजर आयो। पवित्र सरोवरां ऊं जल ले र कावड़ियां भोलेनाथ रो अनुष्ठान कर्यो। सवाईमाधोपुर ऊं म्हाणा खबरनवीस बतायों के शिवाड़ रा नामी शिव मिन्दर समेत न्यारा—न्यारा मिंदरा मांय शिव भक्तां मांय भारी उमाव देखी ज्यो।

.....
पाली रा सोमनाथ मिन्दर मांय महादेव ने महाकाल री तर्ज माथे खास श्रृंगार करी ज्यो। वठे ई सिंज्यां भांग ऊं शिवलिंग बणा र झांकी सजाई।

.....
आज सावण मीनो बीतण रे साथै ई मीना भर ऊं चाल रह्यो कावड जात्रावां रो दौर ई भी थम गया। जयपुर रा झाड़खंड महादेव अर ताड़केश्वर महादेव समेत न्यारा—न्यारा शिव मिंदरां आज भगवान शिव रो खास श्रृंगार करी ज्यो अर महा आरती उतारी ज्यी।

000

नामी गोगामेड़ी मेळो आज ऊं सरू व्हयो। पशुपालन अर देवस्थान मंत्री जोराराम कुमावत मेळा री विधि पूरण सरूआत करी। ई मौके श्री कुमावत कह्यो के मेळा मांय आवण वाळा श्रद्धालुआं री सुविधावां रो पूरा ध्यान रख्यो जायेला।

.....

ई मौके भादरा विधायक संजीव बेनीवाल, जिला कलेक्टर, पुलिस अधीक्षक, समेत न्यारा—न्यारा अहलकार अर जन नुमाइन्दा मौजूद रह्या मेळा मांय कोई 40 लाख ऊं बत्ती श्रद्धालुआं रे आवण री आस है। वटे ई डीडवाना—कुचामन जिला रा परबतसर मांय भरीजण वाळां राज्य थर रा वीर तेजाजी पशु मेळा री राज्य मंत्री विजय सिंह चौधरी झण्डो चढा र सरूआत करी। मेळा मांय न्यारा—न्यारा सांस्कृतिक कार्यक्रमां रे साथै पशु होड़ा ई व्हेला।

000

राज्य मांय बिरखा रा दौर चाल रह्यो है। लारला 24 घंटा रे दौरान केई ठौड़ां हलका ऊं मझला दर्जा री बिरखा दर्ज करी ज्यी। सब ऊं बत्ती बिरखा राजसमंद जिला रा नाथद्वारा मांय मांय 6 सेंटीमीटर दर्ज करी ज्यी। वटे ई धौलपुर रा राजाखेड़ा मांय 5, भीलवाड़ा रा सहाड़ा, करौली रा सपोटरा अर बूंदी रा नैनवा अर दौसा रा महुवा मांय 3—3 सेंटीमीटर पाणी बरस्सो। राजधानी जयपुर मांय आज दोपहरां पाछे मौसम बदल्यो अर हवा रे साथै तेज बिरखा व्ही। भरतपुर अर दौसा मांय दोपहर री बगत तेज बिरखा व्ही। आथूणी जिला मांय कुछ ठौड़ां हलकी बिरखा व्ही। मौसम केन्द्र जयपुर मुजब काले राज्य रा आगूणी हलका मांय कोटा, भरतपुर, अजमेर अर उदयपुर संभागां मांय अर आथूणी राजस्थान रा बीकानेर अर जोधपुर संभागां मांय बिरखा होवण री आस है। **भरतपुर मांय गंभीरी नदी मांय डूब जावण ऊं एक मिनख री मौत व्हे गयी।** जाणकारी मुजब तीन मिनख नाहवण सारू गया हा जिण मांय ऊं एक री डूब जावण ऊं मौत व्हे गयी।

000

प्रधानमंत्री नरेन्द्र मोदी ई महीना री 25 तारीख, दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ हर महीना प्रसारित कर्या जावण वाळा ई कार्यक्रम री 113वीं कड़ी व्हेला। ई सारू आप मुफ्त नम्बर 1800 11 7800 माथे 23 तारीख तांई विचार अर राय भेज सको हो। इण रे अलावा नरेन्द्र मोदी एप अर माई जीओवी ओपन फोरम माथे ई विचार बताया जा सके है।

000